

Qalam

Nombor 46 – Mei 1954 Sya'ban 1373 – 60 Sen

Bulan Ramaḍān al-Mubārak

Sebagaimana seluruh penduduk dunia Islam maka umat Islam di Tanah Melayu adalah menyambut bulan yang berbahagia ini dengan sepenuh-penuh hormat dan gembira.

Bulan Ramaḍān yang di dalamnya al-Quran telah diturunkan adalah membawa sempena yang baik bagi tiap-tiap seorang Islam kepada membanyakkan ibadat dan beramal soleh dengan menerima ujian puasa yang mengandungi penderitaan lapar dan dahaga yang menginsafkan itu.

Puasa, sebagaimana yang dijelaskan oleh Allah 'Azza Wa Jalla dengan firman-Nya adalah tujuannya yang besar sekali ialah supaya dapat mendidik orang yang berpuasa itu kepada bersifat "Taqwa".
Yakni menunaikan suruhan-Nya dan mengawal diri daripada segala larangan-Nya:

Yā ayyuhalladhīna amanū kutiba 'alaykum al-siyamu kamā kutiba 'ala allazhdhīna min qablikum la'allakum tattaqūn.

"Hai orang-orang yang beriman! Difardhukan puasa atas kamu sebagaimana yang telah difardhukannya atas orang-orang (umat-umat) yang terdahulu daripada kamu. Mudah-mudahan kamu bertaqwa".
Demikian maksud perintah Tuhan di dalam al-Quran al-Karim.

Kalau ibadat puasa yang dikerjakan itu tidak dapat mencapai tujuan yang besar tersebut maka penat lelah dan

penderitaan orang yang berpuasa adalah menjadi sesia jua.

Dan hukum puasa itu, pertama menjadi batal sebagaimana pendapatan setengah ulama, atau pun hanya dapat menunaikan fardhu tetapi tidak dapat pahala yang telah dijanjikan oleh Allah kepada orang yang berpuasa.

Perkara ini akan bertambah jelas apabila diketahui makna taqwa dengan lebih dalam lagi. Sifat taqwa ialah suatu perasaan yang mencegah seseorang daripada mengerjakan dosa bahkan akan memandunya kepada mengerjakan taat, dan menjadikan dirinya tenang tenteram, serta berasa syukur dengan cara hidupnya dan dengan rezeki yang telah dikurniakan oleh Allah kepadanya. Perasaan taqwa itulah jua yang akan membawanya mendampingi diri ke hadhrat Tuhan Azza Wa Jalla dengan amal kebajikan sehingga dia akan dapat merasa lazatnya perdampingan itu. Perasaan taqwa juga yang akan memimpin seseorang kepada memperbaiki perhubungannya dengan orang ramai, dan menjauhkan diri daripada menyakiti orang lain, baik dengan perbuatan atau perkataan apa lagi berdusta. Itulah sebabnya Rasulullah (S.A.W) bersabda:

"Man lam yada' qawla al-zūr wa al-'amal bihi falaysa lillāh hājata fī an yada' ta'amahu wa sharābahu." (Barang siapa tidak meninggalkan perkataan berdusta dan berama dengannya, maka tidaklah Allah Ta'ālā berhajat supaya dia – yang berpuasa itu – meninggalkan makan dan minumannya).

Pendeknya tiap-tiap seorang Islam adalah tertuntut di sepanjang-panjang bulan Ramaḍān – siangnyanya ataupun malamnyanya – supaya membanyakkan ibadat dan menjauhkan diri daripada maksiat, zahirnya dan batinnya, kerana puasa yang sebenarnya ialah suatu cara amali untuk membersihkan ruh dan jasad bersama, dan suatu ujian yang berat, mudah-mudahan sekalian kita dapat menempuhnya dengan selamat sempurna.